

फिलेमोनलाई

पावलए परींद ओयो चिथी

आव चिथी फिलेमोनलाई पावलए भयालखानानी परींद ओयो ज़। फिलेमोन परमेस्वरलाई उयुँ हुपुज़्याव कलस्सी सहरलाव तोबो धनी मिँ ओल्यो। नोए ओबाँदा ओनेसिमस यादोज़्यावए कातार हाइद धों:द ओबाव ओल्यो (फिलेमोन १५,१८)। धों:द ओबाव छीनी परमेस्वरलाई उयुँ हुपुद, भयालखानाल लिज़्याव पावललाई ओसघैज़्याव (१०,१३)। है जैद आव चिथील ओनेसिमस फरी ओसाहुए उधुँल ल्यो भैं:द, नोलाई फिलेमोनए बाँदा वाज़ मा:क, उयुँ हुबो भाइ मिताव सम्जिद सुमो ताके लिन्या सरै:सिउ लिज़्या (१६-१७)।

१ डा पावल, येसु ख्रीसए ओयेनए जूनी भयालखानाल लिज़्याव सोनो डास लिज़्याव तिमोथीस गिनल्योनी नँ गिनस परमेस्वरए ओयेनताव खतैसिउ गिनयुँलाव गिनभाइ फिलेमोनलाई आव चिथी परींद गिर्न्डैज़्या। २ आव चिथी परमेस्वरए ओपाँताव गेबैनी अप्फिया, गेस सिप सिप परमेस्वरए ओयेन दाज़्याव अखिप्पस, सोनो नक्किमक दुप्सिज़्याव मन्दलीए

जूनी पाला ज़। ३ परमेस्वर गेबाबु सोनो गेप्रभु येसु ख्रीसनी नियुँ जेल्योदा ओगराँक, जेयुँ होलाँ जैद ओयाचिरक।

पावल फिलेमोनस खुसी ओताव

४ नँ फिलेमोनए नजूनी परमेस्वरलाई डापोंखारिक एकमन्या नमिन हाइद धन्याबाद चरै:व ज़ डानैज़्या, ५ काराव ल्यो ताकिन नँ गेप्रभु येसु ख्रीसलाई

नयुं हुप्द परमेस्वरए छैव उमीरालाई मया दाद नरासमारिज्याव डाथैज्या। ६नो परमेस्वरए उमिनत नयुं हुप्द नदोज्याव येननी खीसए ओयासिउ चाव पाँर बुभिन्या युं भन ज़ उईवक लिद डापोँखारिज्या। ७अ डाभाइ, नँ परमेस्वरए छैव उमीरालाई समारिद यायुं होलाँ जैद नराएज्यावनी डा ब डायुं होलाँ ताद रेव ज़ डालिज्या।

ओनेसिमसए जूनी पावलए उबिन्ती

८डा नँलाई 'आव दोयो' है दान्या खीसनी डाहक उलिदी ब नँलाई कर मालैद, ९डाल्योदा नस० तरा नचींज्यावनी ज़ नदोकिन ताखेहो लिद डाबिन्ती लिज्या। डा पावल इताव सेरो मिँ येसु खीसए उमिनत कैदी तावए, १०नँस ओनेसिमसए उजूनी तोबो बिन्ती डादोज्या। नो मिँ आव भयालखानाल परमेस्वरए ओपाँत डाजमैव डाज़ा ज़। ११नो मिँ डादा नजूनी कान्ल ज़ काम मालागिउ ओल्यो। अब ते नजूनी सोनो डाजूनी ओचाहित ल्यो ताद ले। १२है जैद नो डायुं स्याताव मिँलाई नल्योदा डापरींज्या। १३डा चाव था डारासथैवए भयालखानाल डालिज्याक नो मिँए नँ नपोल डासेवा घदोवक लिद डास नैव ते डापैव। १४खाली नँ 'ताए' है नमाल्योवा पै डामानैके।

नँ डाल्योदा जो मिताव नदोदी ब करनी माःक, नयुं स्यानी वाज़ ओताक है डालिज्या। १५नो मिँ आल धोःद उहुव तोबो ओअर्थ ल्यो लिज्या। जाँवाए जूनी नल्योनी ओधोःदी ब, आकिन ते सग्याको नँस ज़ एकम्या लिन्या ले। १६आकिनी आव नबाँदा वाज़ माःक, साचो नयुँलाव नभाइ स्यासो ब तारिज्या। डा डाभाइ ते ताधुके। नँलाई ते भन नबाँदा ब ताके, प्रभुए उमिनताव नभाइ ब ताके।

१७नँ डालाई ननै मिताव नसम्जिनाकिन डाडाः रँद नोलाई नैव ताके। १८नोए नउपर्त मादान्या येनर ओदोव ताकिन, सोनो कातार हाइद उईव ताकिन, डा ज़ नँलाई ओलोइ डाईया। १९डा पावलए ज़ 'डाफोःया' लिद डासही छाप ब भाःद डाईके। खाली नँलाई डाबाँचैनिउ डागुन उलिदी ब डागुन लिज्या है डामादीए। २०है जैद नँ डाभाइ, प्रभुए उमिननी डाबिन्तीर थैद, खीसलाई याका दाद डायुं होलाँ जैदचाव ताके। २१आव डासरोलाव है डादींवकिन भन कुधु ज़ नदोया लिद डायुं हुबो ज़ लिज्या।

तुपैन्या पाँर

२२फरी ब नँस तोबो डाबिन्ती लिज्या, नभिमक जाँवा पै लिन्याए जूनी पो तोबो जैदचाव ताके। डाजूनी



५३४

फिलेमोन

जेपोंखारिज्याव मिताव आनी पुलुस्द
डाहुइ सैं लिन्या मिताव ब लिज्या।

२३ येसु ख्रीसए उमिननी डास
भयालखानाल लिज्याव इपाफ्रासए
ल्योनी जेरो है दीज्याव। २४ डास

सिप येन दाज्याव डानैर, मर्कूस,
अरिस्तार्खस, देमास सोनो लूकाराए
ल्योनी ब जेरो है दीज्यार।

२५ गेप्रभु येसु ख्रीसए उयुं गरांद
जेयुंल बास ओदोवक।

